

TORITENY - FETIN'NY NIOVAN'NY TOMPO TAREHY



Ity no Zanako malalako, henoy izy.

Ry kristianina havana, amin'izao 06 aogositra izao no ankalazain'ny Eglizy ny fiovan'i Jesoa tarehy teny an-tendrombohitra ka anolorany amintsika sahady amin'ny fankalazana izany : Voalohany ny toetran'i Jesoa rehefa tafatsangan-ko velona izy, faharoa ny toetra miandry antsika, ary fahatelo dia tsy maintsy miombona ao amin'Andriamanitra Ray isika raha miaraka amin'i Jesoa ka miova tanteraka koa ny fiainantsika ary afaka mampiova.

Raha misy vanim-potoana tena maha marinaireo voalaza rehetra ireo dia izao fotoana mavesatra atrehintsika izao. Tsarovy fa ny hanomana ny mpianatra hatrika ny fijaliany no nitondran'i Jesoa azy ireo hivavaka tany an-tendrombohitra. Mitovy an'izany koa izao vanim-potoana atrehintsika an'ity KORONTANAVIRUS ity izao. Mafy ny manjo antsika. Mijaly ny maro. Miandrindra fiovana tokoa isika. Indro àry i Kristy manoro antsika ny lalana mba tsy havesatra ho antsika izao sedra mafy izao. Ireo vakiteny arosan'ny Eglizy amintsika androany dia manampy antsika

Vakiteny I : Dn. 7:9-10,13-14,

Salamo : Sal. 97

Vakiteny II : 2 Pi 1, 16-19

Evanjely : Mt 17, 1-9,

tokoa tsy ho very “repères” na dia maro aza ny korontanin'ity covid 19 ity.

Fantatr'i Jesoa tsara fa havesatra amintsika tahaka ny nahavesarany tamin'ny mpianatra ny hahita azy hifantsika amin'ny hazo fijaliana satria manambara faharesena, manambara ny fahalavoan'i Jesoa resin'ny demony fahavalo ratsy fanahy. Izay lalovany izay no tsy maintsy lalovantsika ihany koa ka mety ho sarotra amintsika ny hiatrika an'izay fitondrana ny hazo fijaliana izay amin'ny lafimpianantsika maro hisan-karazany.

Izany indrindra no nitondran'i Jesoa an'ireo mpianatra hivavaka. Koa rehefa nivavaka izy dia niova ny tarehiny ary namirapiratra. Lazain'ny mpanoratra ny Evanjely aza dia tsy azo notsaintsainina mihintsy ny momba ny famirapiratan'ny.

Ry Kristianina havana, ilay fiovana tarehy dia nataon'i Jesoa ho antsika satria Izy tsy mila, Andriamanitra Izy ka mamirapiratra mandrakariva. Nataony ho antsika io fiovan-tarehy io mba hanambarana fa ao amin'Andriamanitra tokoa no tena fiainana, ao ny fiainantsika. Noharian'Andriamanitra hitovy endrika Aminy tokoa isika ary io famirapiratan'ny endrik'i Jesoa io no tsy maintsy hiombonantsika amin'Andriamanitra. Io no endritsika raha nahary antsika Andriamanitra, izay ny tian'i Jesoa ho tsapantsika. Fantatr'ireo mpianatra telo lahy izay niaraka taminy tamin'io fotoana io ka nahitan'izy ireo ny fiovan-tarehy ka niombona tao amin'Andriamanitra Ray izy ireo.

Vokatry ny fivavahana izany ary tsy maintsy dingana ho antsika tokoa ao amin'ny fivavahana, tsy maintsy tokony hanampy antsika hiova ho tsara kokoa. Ny fiainantsika hiova no tian'i Jesoa ambara; ao amin'Andriamanitra isika, amin'ny alalany sy miaraka aminy ary ao Aminy. Fiovan'ny endri-pianantsika no tsy maintsy miova ka zary fiainan'ny zanak'Andriamanitra. Tamin'izay indrindra ny feon'Andriamanitra Ray no nanambara hoe : "Inty ny zanako malalako, henoy izy". Izany indrindra koa ry Kristianina havana, ao anatin'ny fivavahana no ihainoantsika ny tenin'Andriamanitra. Io no mahatonga antsika matetika milaza ry Kristianina havana fa ilaina dia ilaina ny famakiana ny tenin'Andriamanitra. Tsy hoe sanatrian'izany mamaky "roman" isika fa ny dikany hoe mamaky ny tenin'Andriamanitra dia ny mihaino azy ihany koa.

Izay ny hafatra nataon'Andriamanitra tamin'ny vahoakany raha izy ireo namakivaky ny tany efitra, naniraka azy ireo Andriamanitra : "Mihainoa ry Israely" ny dikany finoana dia ny fihainoana an'Andriamanitra izany hoe manatanteraka ny sitrak'Andriamanitra. Izany no mahatonga antsika rehefa vita ny vakiteny manao hoe: *"isaorana anie Andriamanitra"* na amin'ny Evanjely : *"Dera anie ho anao ry Kristy"*. Fiekem-pinoana no ataontsika eto. Izany ihany koa no mahatonga antsika milaza fa tsy olon'ny soratra isika fa olon'ny Tenin'Andriamanitra na dia vita soratra aza. Noho izany raha mihaino ny tenin'Andriamanitra isika dia mino ka manatanteraka azy, miova tokoa ny fiainantsika, miova ho tsara ary dia izay no dikan'izao fankalazana ny fiovan-tarehy izao mba hahatsapantsika ihany koa tahaka ny tian'i Jesoa ambara raha nitondra ireo mpianany izy ka niova tarehy, hahatsapan'izy ireo sy hahatsapantsika fa ny fihainoana azy, ny fihainoana ny tenin'Andriamanitra ampidirina ao am-po ka manova ny fo ho tsara ary mampiova ny fiainantsika ny tenin'Andriamanitra. Raha miova ny fiainantsika dia miova ho tsara ihany koa ny endrim-pianantsika, ny ataontsika rehetra.

Na dia eo aza ny làlan'ny fiainantsika, ny làlan'ny fijaliana no antony voalohany nahatonga an'i Jesoa niova tarehy teo anoloan'ny mpianany satria tsapany fa havesatra amin'izy ireo ny hibanjina azy eo amin'ny hazo fijaliana. Toa izany koa mety mavesatra ho antsika ny hazo fijaliansika nefa ambaran'i Jesoa ary fa raha miova ny fontsika sy ny endrim-piainantsika amin'ny alalan'ny vavaka sy ny fihainoana ny tenin'Andriamanitra dia ho zary tahaka an'i Piera isika izay nilaza hoe " *Tsy aleo ve mitoetra aty ?* " hanao lay ho an'i Elia, ho an'i Moizy ary ny lay farany izay hahafahana miombona amin'Andriamanitra, nahatsapa an'izay i Piera. Dienty izao anefa raha mihaino ny tenin'Andriamanitra isika dia miombona amin'ireo mpaminany ireo ka miova ny fiainantsika. Na dia eo aza ny làlam-piainana mety manahirana antsika dia aoka handray an'i Kristy isika, hamaky ny tenin'Andriamanitra sy hihaino azy. Mazava ny feon'Andriamanitra : "*Indro ny Zanako Malalako henoy Izy*". Miankina amin'ny fahazotoantsika mihaino an'i Jesoa no hampiova ny fontsika, ny fiainantsika ka hamirapiratra ho zary fahazavana sy fanasina amin'ireo manodidina antsika isika na dia eo ny adim-piainana mety handrendrika antsika. Ho tahaka ny volamena mamirapiratra isika ka ho sambatra ao amin'Andriamanitra satria matoky Azy sy mihaino Azy ary ho Kristianina marina tokoa, ho EO V MISIONERA VITA BATEMY KA IRAHINA ZARY TABERNAKLA VELONA MANORINA ETA.

Ry Jesoa Kristy Tompo ô, enga anie mba hiova tokoa ny fiainanay noho ny fahasoavanao, noho izahay mihaino Anao, mino Anao ary matoky anao. Ny finoanay anie ho zary fanilo manazava ny fiainanay, hahay hampitraotro ny finoana sy ny fiainana tokoa izahay ka na dia eo aza ny sedram-piainana maro isan-karazany dia ho soa, hamirapiratra ny fiainanay. Amen

Mompera Arseveka Mgr Benjamin Ramaroson